

Inatsisartut Suleriaasianni § 33 naapertorlugu Naalakkersuisut matumuuna aalajangiiffigisassatut siunnersuummik saqqummiussipput:

**Inatsimmut, Kalaallit Nunaanni eqqartuussisaatsimut inatsisip (pinerluttulerinermi il.il. meeqqat inuusuttullu videokkut apersorneqartarnerat) allannguutissaatut siunnersuummut Namminersorlutik Oqartussat oqaaseqaatissaannut Inatsisartut aalajangiiffigisassaattut siunnersuut**

(Pinngortitamut, Avatangiisinut Inatsisinillu Atuutsitsinermut Naalakkersuisoq)

## **Siullermeerinnineq**

### **Tunngavilersuutit**

Inatsisissatut siunnersuummi siunertaavoq meeqqat inuusuttullu ilungersunartumik pinerluttuliornermi eqqugaasimasutut imaluunniit isiginnittuusimasutut ilimagineqartut illersorneqartarnerisa pitsaanerulersinneqarnissaat. Tamanna meeqqap qaqugukkut video atorlugu apersorneqartarneranut ukiut killissaliussat ukiunit 12-iniit 15-inut qaffatsinnerisigut pissaaq. Pisuni immikkut ittuni ukiut killissaliussat ukiunut 18-inut qaffatsinneqarsinnaapput.

Video atorlugu apersuinerup kingunerisaanik, meeraq imaluunniit inuusuttoq pinerluttulerinermut suliani misissuinerup nalaani video atorlugu immiunneqartumik apersorneqartalissaaq aammalu meeqqap imaluunniit inuusuttup eqqartuussivimmut ornigulluni tassani apersorneqarnissaanut taarsiullugu eqqartuussinerup nalaani uppersaasatit takutinneqartalissalluni. Video atorlugu apersuineq toqqissisimanartumi atugassaqartitsiviusumik, video atorlugu apersuinissamut immikkut ilinniarsimasumit apersuineq ingerlanneqarluni, politiinut nalunaarutiginninnerup kingorna sapinngisamik sukkanerpaamik, ingerlanneqartassaaq.

Inatsisissatut siunnersuut pingaarnernik makkuninnga imaqarpoq:

- Video atorlugu meeqqanik apersuinissamut ukiunut killissaliussaq 12-inik ukiulinniit 15-inik ukiulinnut qaffanneqarpoq. Video atorlugu apersuineq assersuutigalugu kinguaassiuutitigut pinerluttuliornerit, qanigivallaakkamik atoqateqarnerit aamma persuttaanerit ilaqutariit iluanni pisut pillugit suliani pisinnaavoq
- Pingaarnertut malitassaassaaq meeqqat eqqartuussivinni eqqartuussinerup nalaani uppersaasatut nassuiaateqartussaassanngitsut.
- Illersuisoq imaluunniit pasineqartoq video atorlugu apersuinerup uppersaasatit atornerqarnissaanut akerliuppat, kingusinnerpaamik video atorlugu apersuinerup ingerlanneqareernerani sapaatit akunnerisa sisamat qaangiunneranni apeqqut eqqartuussivimmut suliaqkiissutigineqassaaq.

Video atorlugu apersuinermik annertusisamik atuisarnissamut ilusiliaq, pillaanissamut suliani meeqqanik inuusuttunillu video atorlugu apersuisarneq pillugu Pinerluutilinnik eqqartuussisarnermut ataatsimiititaliap isumaliutissiisutaani nr. 1554/2015-imi

siunnersuutigineqartoq, Inatsisissatut siunnersuummut tunngavigineqarpoq. Video atorlugu meeqqanik apersuisarneq pillugu maleruagassat siusinnerusukkut pinerluttulerinermut inatsisip aamma eqqartuussisarnermut inatsisip allannguuteqartinneqarnissaat pillugu inatsisissatut siunnersuummut siunnersuutip (UPA 2014/ 136) akuerineqarneranut atatillugu Inatsisartunit sammeneqarpoq, tassani inatsisinut ataatsimiititaliap siunnersuut iluarisimaarlugu, kisianni ukiut killissaliussat 15-inik ukiulinnut killeqartinneqartariaqaraluartut oqaatigalugu.

### **Pisortanut aningaasaqarnikkut allaffissornikkullu sunniutaasussat**

Aningaasartuutaanerussat politit sinaakkutissaasa atuutereersut iluanni akilerneqassapput, taamaalillunilu Namminersortutik Oqartussanut aningaasartuuteqarnerunermik malitseqassanani.

### **Inuusutissarsiortunut namminersortunut aningaasaqarnikkut allaffissornikkullu sunniutaasussat**

Soqanngilaq.

### **Innuttaasunut aningaasaqarnikut allaffissornikkullu sunniutaasussat**

Soqanngilaq.

### **Tusarniaaneq**

Inatsisinik atuutsitsinermut ministereqarfik tusarniaanerup ingerlanneqarneranik isumaginnittuovoq, tassani Kalaallit Nunaanni oqartussaasut attuumassuteqartut akuutinneqarlutik

### **Ilanngussat**

1. Kalaallit Nunaanni eqqartuussisaatsimut inatsisip (pinerluttulerinermi il.il. meeqqat inuusuttullu videokkut apersorneqartarnerat) allannguutissaatut siunnersuummut missingiutip naalisarnera
2. Kalaallit Nunaanni eqqartuussisaatsimut inatsisip (pinerluttulerinermi il.il. meeqqat inuusuttullu videokkut apersorneqartarnerat) allannguutissaatut siunnersuummut missingiut